

## Gedanken zum Jahr vor Präsidentin

Trotz Corona hei mir i aune Riege einiges dörfe erläbe. Aber vo däm söue euch im Abschluss üsi Leiterinne verzeue.

**„Es geht im Leben nicht darum, zu warten, bis das Unwetter vorbeizieht.**

**Es geht darum, zu lernen, im Regen zu tanzen!“**

Und was hei mir für nes Unwätter über üs müesse la ergah. In Form vomene chline gemeine Virus hets über üs tobt, hets grüttlet und gschüttlet. I Wäue isches gange, het üs in Sicherheit la wähne, nume, um när in Form vomene Tsunami wieder ds zrüggs cho.

Wie erstarrt simer gsi am Afang. Hei üs abkapslet, zrüggezoge. Hei immer wieder usem Fänschter gluegt und üs gfragt, isches jetzt düre? Oder chunts am Ändi no schlimmer?

Feschkli si verschobe worde, när abgseit und si schlussändlech vom Tätigkeitsprogramm verschwunde.

Ganz langsam aber si die erschte Versueche cho, d Nase vielleicht doch i das Unwätter ds stecke. Abdstaschte, wie rägedicht mir ipackt si.

Für das hei mir aber ou ganz gueti Fründe brucht. Mir hei dörfe d Erfahrig mache, dass üsi Fründe si zu Rägeschirme worde. Dass Fründschafte üs hei Schutz gä, üs hei starch gmacht, üs hei Sicherheit gä.

Ds Unwätter het sech afa zrügzieh, mir hei wieder meh dörfe mache. Und mir heis gnosse und si glücklech gsi. Dr Räge isch aber immer schnäu wieder zrüggs cho, und mir hei witerhin müesse erfinderisch si, damit mir aui Regle ihaute.

Mir si muetig worde, und hei immer wie meh ungerem Räge afo ungerüh. Und wens isch guet cho, de hei mir erscht rächt im Räge tanzt.

Ds Unwätter het üs zeigt, was mir chöi, wär mir si, und vorauem, wär üsi Fründe si. Ou wenn mir dr Rägeschirm nid immer bruche, scho nume s Wüsse, dass är da isch, git Sicherheit. Viu vo dene Fründe begleite üs scho lang, und

das vorauem ou wäg em Turne. Darum gniesset s zäme si im Turne, sit luschtig,  
fröhlech, düet rede mitenang, aber das am beschte nachem Turne zäme ir Beiz.  
Dr Grundstei zu Fründschafte wird oft dert gleit.

Ig bi glücklech, chöi mir hüt hie zäme si. Dass mir üs aui wieder gseh. Jung und  
nüm ganz Jung im gliche Saal, mit dä gliche Inträsse.  
Es rägnet, isch ächt das es Ohme?

Darum mini liebe Turnerinne, ig bi überzügt, mir hei glehrt, im Räge ds tanze.

Tanzet witer im 2022, es lohnt sech!!

Schwadernau im April 2022

Eui Präsidentin

Claudia Christen